



Bájkkeavijssa NuorttaSálto



Tæksta: Børge Strandskog
Járggálibme: Divte Media AS

Anta Pirak. Foto: Ludwig Wästfelt/Ájtte.

Anta Pirak ja Jáhttesáme viessom

■ Jagen 1937 almoduváj vuostasj tjáppagirjálásjuoda girjje julevsámeigiellaj. Anta Piraka *Jáhttesáme viessom* gávvit Jáhkámáhkke-sámij iellemav navti gáktu lij sulle 100 jage dássta ávddála.

Girjje gávviduvvá gállegruvvon gájkajda gudi sáme histávras, iellemvuoges ja dábijs berusti, ja akta dajs ájnnašamos gáldojs julevsáme giela birra. Girjen gávviduvvá boatsojsujto ja iellem bohttsubarggen jagev birra. Dat sisadná aj moadda báva ja subtsasa Jáhkámáhkke guovlos.

Anta Pavasson Pirak riegádij Sirggán jagen 1873. Ájgáda lidjin áellosáme. Girjen subtsas Anta Pirak gáktu ieddnes ja maññela vielja suv áhpadin láhkát, maññela iesj áhpaj tjállet gá moattedij dav mij girjijn tjuottjoj. Anta lij

oahppelis, manáj áhpadiddjeseminárraj ja muhtem jage bargaj sáme manáj áhpadiddjen. Sæmme báttá lij sujna ietjanis ællo mav gáhttij. Mañenagi sjattaj gássjelis dajt guokta virgijt kombinerit, danen áhpadiddjen hiejtij ja ællobargguj álgij ælles virgen.

Jáhttesáme viessom tjáleduváj 1926 tjavtja. Anta Pirak ja girkkohærrá Harald Grundström moaddi æjvvalijga muhtem turisstasiebre hyhton. Anta subtsastij julevsámeigiellaj, girkkohærrá tjálij mij javladuváj. Ávddábáhkuj girjjáj mij moadda jage maññela almoduváj, tjálij Grundström Anta Piraka birra ahte

“viehka buoragit mujttá ja sujna le sjuggelis gávådallam, ahte állu mánnávuoda rájes lij dálusj bávajt ja histávrajt berustam majt suv ájgáda ja iehtjáda lidjin guhka dálvveiehkedit subtsastam”.

Grundström vuostatjin girjev svierigadárogiellaj járggálij ja nabdij dav *En nomad och hans liv* ja almoduváj jagen 1933. Dat vijdes láhkáj Jáhkámáhkke-sámij iellemav gávvit. Mánájstáhkusa, oasesmano Ubbemij, áhpadibme, ulmutjahttem, urudisá ja duodje. Valla gájkínávdemusát boatsojsujto jagev. Snivva gávvit boatsojsujtov gáktu lij

ávddál motávra ja ádá ájgge bádi, ja navti le árvogis gálldo máhtudahkaj boatsojsujto birra gáktu dájmaduváj 100 jage dássta ávddála.

4 jage maññela, jagen 1937, bádi girjje julevsámeigiellaj, vuostasj girjjen ávvánis. Harald Grundström lidjin Anta Piraka tjállusa ávkken gá girkkohærrá maññela almodij báhkogirjestis *Lulelappsk ordbok* nuppát væráltdoaro maññela.

Anta Pavasson Pirak jámij jagen 1951, 60 jage dássta ávddála.

* *Muhtema Pirak-slevtan ávkkin vuona bieles guohtomednamijt. Guhti árvedahte lij Anta Piraka tjehtje, Anders Hovasson Pirak, jádi Hábmerij fámiljajnis 1870-lágo álgon, valla fellaj hájes láhkáj juo jgen 1873. Girkkohærrá tjállusij milta girkkogirjen de manáj jieña tjadá Rivtakvuonan (Sisnuoren), besaj gáddáj, gánná maññela gávnin jábmám. Girkkohærráj diedoj milta lij jábmám vájbbamis. Áhkásj Botel (Nilsdr Kallak) ja bárnnes Pava maññela guhkijt árojga muhtem gámán Sátonjárggagáben.*

Gáldo:
www.samer.se (Sápmi)
Hábmera girkkogirje